



1. juni Ilulissani nivaqqaarnermi oqalugiaat

(Inuussutissarsiornermut, Nukissiuuteqarnermut
Ilisimatusarnermullu Naalakkersuisoq Jess
Svane)

Asasakka nunaqqatikka, maani Ilulissani najuuttusi qaaqqusallu.

01-06-2019

Kiisami ulloq nalliuppoq Ilulissani Kangiani Illorsuup sanallugu aallarnenera
pisortatigoortumik malunnartinneqarfissaa.

Postboks 1601
3900 Nuuk
Tlf. (+299) 34 50 00
E-mail: isiin@nanoq.gl
www.naalakkersuisut.gl

Nuannaarutigeqaara tikeraat ornittagassaat nunarsuarmi kusanarnerpaat ilaat
ukiorpaalussuarni pilersarusiorneqareersup sanallugu allartinnera
malunnartitsiniarlugu aaqqissuussamut taama amerlatigisut ullumikkut
peqataajartormata.

Immikkut Real Dania qutsavigerusuppara, Kangiata Illorsuanut tapiissutaannut
annertuumut. Pikkorilluinnartumik peqqissaarluinnartumillu annikitsortai
maluginiaqqissaarlugit ataqatigiissaaralutillu pilersarusiorsimmammata.

Naalakkersuisut tungaanniit qutsaviginiarpakka ulloq manna tikillugu
peqataasimasut siunnersuisartut, illussanik titartaasartut inuillu allatigut
suliniummut tapertaasimasut. Avannaata Kommunia
sanaartorfigiuminarssaanermik isumaginnittoq ilanngullugu.

Maannamut aningaasaateqarfiit saqqummersitat pilersinnissaannut
ilapittuuteqarsimasut aamma assut qutsavigerusuppakka: Nordea-Fonden,
nunanilu tamalaani aningaasaateqarfiit allat. Kingullertut Augustinus Fonden
saqqummersitassanut ilassutissanik tapiissuteqarniarluni nalunaaruteqarsimavoq.

Malunnarpoq Ilulissat Kangiani Illorsuusaq sutigut tamatigut
nalissaqanngitsuunissaa peqataasut tamarmik sulissutigerusukkaat.
Aamma paasivarput nunat tamat akornanni illorsuaq suliluunniit sanaartorlugu
aallartinneqanngikkaluortoq nersorinnippaluttumik maluginiarneqartoq.

Angusarissarusunnerput annertuvoq. Taamaattumik Ilulissani Kangiani
Illorsuaq saqqummersitsiviunnarani kisianni aamma naalakkersuinermik
suliaqartunit, ilisimatusartunit siunertanillu aallarnisaasartunit silaannaap
allanngoriartornera pillugu oqallikkusuttunit atorneqarnissaa kissaatigaarput.

Tamaanimi oqallisigineqartut matup silataani toqqaannartumik malinnaaffigineqarsinnaapput.

Ilisimatuussutikkut Siunnersuisoqatigiinnik pilersitsisimavuvut nunatsinniit nunallu tamat akornanni ilisimatusarfeqarfinnit ilaasortalersukkamik. Ilisimatuussutsikkut Siunnersuisoqatigiit paasissutissanik ingerlatitseqqisussatut pingaaruteqarput. Taakkumi qulakkeertussaavat sammineqartuni paasissutissat orniguttartunut saqqummiunneqartussat nutaanerpaajuarnarnissaat.

Neriutigaarpullu ilissi innuttaaqatikka Kangiani Illorsuaq uumassusilimmik atorluarumaarissi, minnerunngitsumik Sermermiunukaraangassi aqqusaartagariumaarissi.

Maani siunissamut tunngasunik misileraaffik siumorsinnaavarsi, sermeq pillugu misileraavik, minnerunngitsumillu sermeq qillerlugu qaqitat allanik asseqanngitsut oqaluttuarisaanermi piffinnik assigiinngitsunit pisut aamma misigisaqarfigisinnaallugit. Taamaattumik Kangiata Illorsuani meeqqanut inersimasunullu iternga tikillugu paasisassarsiorfissat amerlassaqaat.

Periarfissaq manna atorlugu pinngittoorusunngilagattaaq meeqqat ulluanni pilluaqqusissallunga.

Ullumikkut 1. Juni ulloq aamma tassaavoq, nunat assigiinngitsut akornanni meeqqat ulluattut malunnartinneqartartoq, ukiut tamaasa uterfigineqaqqittartoq susoqarfiusarlunilu.

Meeqqat inuusuttullu nunatta siunissami nukissatut pingaarnerpaartarivaat.

Meeqqat inuusuttullu pitsaasumik toqqissisimasumillu alliartornissaat qulakkiigassaraagut.

Angerlarsimaffiit toqqissisimasut, atuarfik pitsaasoq tunngaviliisussaavoq inersimasunngorluni pitsaasumik inuuneqalernissamut, taamaalillunilu nunatsinni ineriartornissaanut tunngavileeqataassallutik.

Taamaattumik Naalackersuisut immikkut nuannaarutigilluinnarpaat Ilulissani Kangiata Illorsuat atuarfinni ilinniartitsinermi pingaarutilittut inissisimalissammat.

Ilulissani Kangiata Illorsuat, Atuartunut sammisaqartitsinermut pilersinneqas-saaq siku, sermeq klimalu pillugit ilisimasanik paasissutissiisinnaasutut, nunatsinni nunanilu allani atuartunut naatsorsuussaassalluni.

Taamaattumik nunatsinni nunarsuattalu avannaani issitoqarfinni silaanaap
pissusaata sunniutai pillugit, nunarsuarmioqatitsinnut ersarissaaqataanissamut
meerartatta peqataanissaat neriuutigaara.

Kangiata Illorsuata 2021-mi aasami ammarnissaanut tamatta annertuunik
qilanaarutissaqarpuvut.

Tamassi tikilluaqqigitsi pilluaritsilu.

Qujanaq.